



*La vefue Iudith coupant la teste d'Olofernes, deliura la Cité de Bethulie
afsiégé par ce Tyran.*



LOFERNES Lieutenant general pour Nabuchodonosor, qui se vouloit faire reputer pour Dieu sur Israel, apres auoir pris & pillé plusieurs villes, vint assieger Bethulie avec cent vingt mille hommes de pied, & vingt-deux mille cheuaux, iceux estans disposez en bataille, les enfans d'Israel eurent recours à Dieu avec larmes & ardente priere. Olofernes donc voyant la Ville forte, leur coupa les fontaines, qui fut occasion que l'eau leur faillit. Et en cette perplexité le peuple vint à Ozias, disant, Tu vois ta faute pour n'auoir voulu parler de paix aux Assyriens, & sommes proches de nostre fin. Ozias voyant les grandes clameurs du peuple, avec larmes leur dist : Mes freres, bon courage encore cinq iours, & si Dieu ne nous donne secours, nous rendrons la ville. Or estoit en Bethulie vne vefue nommée Iudith, fort renommée, & craignant Dieu, laquelle s'opposa au dire d'Ozias, qui vouloit bailler terme de cinq iours à Dieu. Parquoy ayant pris aduis des Anciens du peuple, elle se para d'ornemens precieux pour aller au camp d'Olofernes, qui apres l'auoir veue & ouy parler, la prit en telle amitié, qu'il voulut dormir avec elle : ce qu'elle feignant luy accorder, fut introduite en la chambre où il estoit ja tout endormy de vin. Adonc ayant inuoqué Dieu, s'approcha du liét, & tira son glaiue, dont elle trancha la teste du Tyran qu'elle bailla à sa seruante, & la porterent à la ville. Lors avec grande hardiesse furent mis en route les Assyriens par ceux de Bethulie, qui en rendirent graces eternelles au Dieu viuant.

Iudith 7. 8. 9. 10. 11. 12. & 13. Chap.